


白沙集

五



一〇三六	漢書門類
七五〇	
六五〇	
一〇六	
一〇	

三六函	一〇三六	漢書
一七架	一〇六	
	一〇	

内閣文庫	
番號	漢 10360
冊數	10 (6)
函號	316 111



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak






綴じ部(喉部分)の文字など開きが不鮮明な箇所あり

白沙子全集卷之五

古選

和楊龜山此日不再得韻

能饑謀藝稷冒寒思植桑少年負奇氣萬丈磨
 青蒼夢寐見古人慨然悲流光吾道有宗主千
 秋朱紫陽說敬不離口示我入德方義利分兩
 途析之極毫芒聖學信匪難要在用心臧善端
 日培養庶免物欲戕道德乃膏腴文辭固粃糠
 俯仰天地間此身何昂藏胡能追軼駕但能激



餘芳持此木鑽柔其如磐石剛中夜攬衣起沉
吟獨徬徨聖途萬里餘髮短心苦長反此歲未
暮驅車適康莊行遠必自邇育德貴含章邇來
十六載滅迹聲利場閉門事探討脫俗如驅羊
隱几一室內兀兀同坐忘那知顛沛中此志竟
莫強譬如濟巨川中道奪我航顧茲一身小所
繫乃綱常樞紐在方寸操舍決存亡胡為謾役
役斷喪良可傷願言各努力大海終回狂

答張內翰廷祥書括而成詩呈胡希仁提

學

古人棄糟粕糟粕非真傳眇哉一勺水積累成
大川亦有非積累源泉自涓涓至無有至動至
近至神焉發用茲不窮緘藏極淵泉吾能握其
機何必窺陳編學患不用心用心滋牽纏本虛
形乃實立本貴自然戒慎與恐懼斯言未云偏
後儒不省事差失毫釐間寄語了心人素琴本
無絃

代簡答羅一峯殿元

臺城一揮袂忽忽星週五路永消息斷年深別
離苦思君髮為白始白數莖許今晨對書尺白
者不可數先生天下士詎肯顧衡宇悵望曹溪
約獨與光也語一峯約會南華不至

贈張叔亨知縣

栖栖白沙舫影弄寒江月夫君沙陽令胡事顧
微劣我祖在九冥願君為墓碣三夜茆簷下寒
燈坐來滅感子心意勤愧我言詞拙明發江上
舟踟躕與君別

戲贈館賓

遲遲歲將暮戚戚懷故里館中饑鼠多旅食驢
兒尾垂德於不報世間寧有此行李無一錢還
家對妻子

冬夜

長夜氣始淒木綿被重裘端坐思古人寒燈耿
悠悠是時病初間背汗仍未收學業坐妨奪田
蕪廢鉏耨高堂有老親徧身無完綉丈夫庇四
海而以俯仰憂口腹非所營水菽吾當求明旦

理黃犢進我南岡舟

又

我從省事來過失恒十九喜怒朝屢遷言為夕
多苟平生昧慎獨即事其掣肘孔子萬世師天
地共高厚顏淵稱庶幾好學古未有我才雖鹵
莽服膺亦云久胡然弗自力萬化脫樞紐頽顏
無復少此志還遂否歲月豈待人光陰隙中走
念此不成眠晨星燦東牖

經鱷洲

夕舫凌大波北風吹我席冥冥鱷洲煙宛對
山碧來鴈知天寒歸人看月色超超塵外心浩
矣周八極

崖山看大忠祠豎柱阻風七日後發舟用
舊韻

青青竒石草上有牛羊躅洶洶崖門水遠帶湯
瓶名山綠浮雲散孤嶼初日明村曲言歸輒風濤
無乃疑張陸遲遲重遲遲畏此波心木漁人植
長木於

波間置簷俗呼為冒
我木觸之能覆舟

韻海云砥徒弄切
舡板木

自策示諸生

賢聖久寂寞六籍無光輝元氣五百年一合又
一離男兒生其間獨往安可辭邈哉舜與顏
竊或見之其人天下法其言萬世師顧予獨何
人瞻望空爾為年馳力不與撫鏡嘆以悲豈不
在一生一生良遲遲今復不鞭策虛浪死勿疑
請回白日駕魯陽戈正揮

湖西八景為羅脩撰作效一峯體
太極九春

天城列兩儀其中位太極名山不悟名象生焉知
畫前易伏羲古已亡圖書久晦蝕寄語山中人
妙契在端默

翠玄洞天

翠玄在何許乃在金鰲麓石門俯深幽來者秉
明燭繡壁誰可緣丹房我當宿呼童烹金鰲膏
此千丈木

一峯來秀

湖西有一峯天地得撐拄旁有龍塘峽北有浮

香塢我行崑崙立一望一延竚歸來二三子抵
掌太極語

三峽迴清

一峽蟠一龍群山莽回互武夷雖九曲三峽誰
勝負澄澄水上月歷歷谷中樹焉得千丈筇坐
弄潺湲處

金鰲霽雪

一鰲海上來頭戴雪花白諸鰲起相拒千秋歸
不得仙人羅一峯永戲金鰲側借問別離時西

佛生彌勒

玉冕晴雲

玉冕臣諸峯左右羅絡之雲來巾其顛得雨不
復疑豈無澤物功雲覆在何時悵望百谿春廣
濟蒼生饑

飛輦橫翠

我昔遊太空太空雲冥冥歸來控翠蚪力與金
鰲爭巍巍太極尊揮置東西行如何千載下空
儼飛輦名

大流垂玉

大流無此奇偶值銀河傾願回銀河流免與世
濁并一洗日月光再洗天地清何止天地清萬
世無甲兵

題冷庵

江西僉憲
陳琦自號

舉世好近熱子獨畏之猛投身向壑雪永謝白
日影玉壺貯清冰秋露滴金井是以冷自勝于
世非絕屏假令務絕屏過與近熱等我以道眼
觀天下方首肯寒暑兩推移正中太和境寄語

庵中人不熱亦不冷

扶南訪黃巖尹廊載道適來顧白沙兩不
值賦三側韻

行舟石門浪不識扶溪口時時聞來徃日入喪
水手昨暮黃巖馬來嘶白沙柳惜哉兩不遇獨
坐空搔首

我有一斗酒願與子秉燭子來復空去值我不
在屋穉子呼不至踉蹌走入竹明旦歸我艇先
後迓以告

閑居不礙出偶出負佳客問客來何許來自黃
巖謫長安接笑語中道有睽隔悠悠百年內與
子異顯默

感事

君心如逝水一往不復旋誰能萬里浪安坐駕
此舩傷哉一何愚由我不由天仁者固有矜智
士乃自全

夢觀化書六字壁間曰造物一場變化

孔子曳杖歌逍遙變化後我夢已逍遙六字書

在牖聖愚各有盡觀化一遭走問我年幾何春
秋四十九死生若晝夜當速何必久即死無所
憐乾坤一芻狗

貪泉

藜藿可養生棺槨可送死瓦礫是黃金貪泉亦
清泚飲水心不易豈獨夷齊爾山鬼笑儂家儂
家笑山鬼

九日諸友會飲白沙得雁字

黃菊有佳辰良朋樂呼喚爭持淵明杯來接子

桑飯落葉迎馬鞭斜暉轉沙岸雨聲靜秋竹池
影入江雁酒酣獨高歌呼兒續我斷諸君極留
戀十觴亦不筭雖無孟嘉量且免落帽亂百年
能幾何去者已強半來會安可期細把茱萸看

贈林汝和通判

在昔黃金臺與子初周旋萍蓬忽相失不見垂
十年昔爲禮曹官今搖慶陽鞭常聞太華峯峻
絕峙中天雅志在登陟矯如孤鷗騫適來南海
旁問訊滄洲屢語舊未終日棲棲有所牽丈夫
重出處富貴如浮煙行則為在田止則為在淵
勞勞夫何爲贈子千金言

贈馬龍如湖西奠一峯先生

晨興坐捫虱有客窺我床客來問何許顏色慘
不光去歲秋在季文星墜西江而師羅一峯牽
視我弟兄相見不得語失聲淚滂滂子行詣湖
西問訊我有將夙昔夢見之恍若芙蓉城覺來
索苦句句就涕未停何以告一峯寄意於瓣香
索火化奠文一峯其洋洋我病久南海欲徃未

白少子全集卷五
九
得行送子出門去目極秋天長

贈陳秉常

遠色霽初景清風振遙林子來入我室弄我花
間琴正聲一何長幽思亦已深願留一千歲贈
子瑤池音

黍稷雜萑葦邪思亂正性人為一鹵莽諉曰天
之命白日朝出東溟史復西暝良時誠可惜逝
矣悲莫競

大舜卷婁之莊周竟奚取人生貴識真勿作孟
浪死誰能去中土儼舍朝鮮里白首金石交視

我南川子

我否子亦否我然子亦然然否苟由我於子何
有焉人生寄一世落葉風中旋胡為不自返濁
水迷清淵

藤蓑

一蓑費幾藤南岡礪朝斧交加落翠蔓制作類
上古吾聞大澤濱羊裘動世祖何如六尺蓑滅
蹟蘆花渚舉俗無與同天隨夢中語今夜不須

歸前溪正風雨

人好蓑亦好月光水亦光
水南有酒媪酒熟喚我嘗
半酣獨速舞舞罷還舉觴
所樂在知止百年安可忘

挽蓑欲何為新月出東嶺
獨速舞不休凌亂何由整
曠哉漆園吏自形還自影

新蓑藤葉青舊蓑藤葉白
新故理則然胡為浪忻戚
扁舟西浦口坐望南山石
東風吹新蓑浩蕩滄溟黑
須臾月東上萬里天一碧
安得同心

人婆娑共今夕

朽生何所營東坐復西坐
搔頭白髮少攤地青蓑破
千卷萬卷書全功歸在我
吾心內自得糟粕安用那

賽蘭

南有賽蘭香名花人未識
光風散微馨甘露洗新碧
一月薰蒸來氤氳在肝膈
乃知方寸根中稟天地塞
誰為續騷手俯仰空悽惻
窓戶悄無人圖書共昕夕

天人之際

天人一理通感應良可畏千載隕石書春秋所
以示客星犯帝座他夜因何事誰謂匹夫微而
能動天地

荅梅侍御見寄

群龍盛朝野弱羽聊山林行春忽傾蓋對榻山
花深引我一杯水寫君龍唇琴永言歌六篇風
雅有遺音乃知鷹鷂氣未愜鸞鳳心王事有驅
迫暮雨別江潯離情落晚趣再枉三洲吟何以
舒我懷青天盼遙岑

寄題三洲巖

我行蒼梧道息槩荒江湄連岡一以眺石室涵
晚暉前哲有題字執炬往讀之遲回北壁下目
擊元公遺今古一相感光風吹我衣虫鳴丹竈
中葛仙胡不歸對之發長嘯宇宙今何時圓蟾
夜罔罔蝙蝠秋飛飛願言托高樓行矣無是非
病中寫懷寄李九淵

出門見齋顏十日不一逢以我腹中滿憶君頭

上風頭風尚可灸腹滿何由通受氣我亦薄况
乃疾病攻五十去始衰三四謝春冬鬢顏倏已
彫血氣少復充客來索我書穎禿不能供茅君
稍用事入手稱神工以茲日袞袞永負全生功
長揖謝茅君安靜以待終

和梅侍御見寄

飛盖凌滄溟高臺拂朱鳥乾坤一水浮日月雙
輪繞塵埃紛局促正坐眼孔小景山千丈松慰
我冰雪皎萬里一春風東西逐騷鬩故人子羅
子仙鶴歸華表暮雨江門舟含悽問封草假令
鮑叔在一士亦不少誰云越臺近舉目河山杳
冥冥白沙塢雲煙共昏曉

題劉氏雙節卷

阿姑與阿婦守此芳歲闌三十寡且貧紡績供
朝飧孤兒泣長夜秉燭更抱看苦心兩咽絕芳
顏亦彫殘持此雙白璧輝映天地間

聖皇重民極門閭合施丹煌煌東白碑終古埋
空山我母寡更早賦詩涕汎瀾弱草因風靡頽

波良獨難

送李劉二生還江右用陶韻

夜聞桂樹芳晨起山鳥喧客從遠方來歷我階
西偏手持諸侯書徵會在匡山我願結其人遂
往不復還滯形宇宙內俛仰獨何言
中年見二子楚楚西江英問訊徐蘇里千年有
餘情開尊對溟月高歌亦心傾胡為別我去感
此秋蛩鳴贈處各有言慨然盡平生

漫題

日月逝不處奄忽幾華顛華顛亦奚為所希在
寡愆韋編絕周易錦囊韜虞絃饑飡玉臺霞渴
飲滄溟淵所以慰我情無非畹與田提攜衆雛
上啼笑高堂前此事如不樂它尚何樂焉東園
集茅本西嶺燒松煙疾書澄心胸散滿天地間
聊以悅俄頃焉知身後年

仕者必期通隱者必期高麋鹿或可群肉食安
可饕聖人履中正白首濟川舫悠悠荷簣者果
識聖心勞浮雲馳白日黍稷生蓬蒿飯蔬食飲

水曲肱謝遊遨汶上去不顧陋巷貧絕交徒聞
武城宰割雞以牛刀

拉馬玄真看山

官府治簿書倥偬多苦辛文士弄筆硯著述勞
心神而我獨無事隱几忘昏晨南山轉蒼翠可
望亦可親歲暮如勿徃枉是最閑人近來飲酒
者惟我與子真能移柳間舫同泛江門津

感劉琨與盧諶事

越石信英臣子諒亦文雅生遭晉運微奔走風
塵下晉陽笑明月胡雛夜回馬并州困石勒從
事為別駕成敗非所論吾憐鑿坏者

和陶 一十二首

歸田園

我始慚名羈長揖歸故山故山樵采深焉知世
上年是名鳥搶榆非曰龍潛淵東籬采霜菊兩
渚收菰田游目高原外披懷深樹間禽鳥鳴我
後鹿豕遊我前冷冷玉臺風漠漠聖池煙閑持
一觴酒懽飲忘華顛逍遙復逍遙白雲如我閑

白沙子全集 卷五
乘化以歸盡斯道古來然

高人謝名利良馬罷羈鞅歸耕吾豈羞貪得而
妄想今年秋又熟謹呼負禾往商量大作社連
村集少長但憂村酒少不充儂量廣醉即拍手
歌東西卧林莽

近來織畚徒城市售者希朝從東臯耕夕望西
巖歸貧婦業紡績燈下成歲衣但令家溫飽不
問我行違

移居

萬金論買隣千金論買宅豈不念子孫而以營
朝夕長揖都會里來趨白沙役壤地何必廣吾
其寄一席隣曲彌樂今園林尚懷昔吾志在擇
善無然復離析

留連晡時酒吟咏古人詩夕陽傍秋菊采之復
采之采之欲遺誰將以贈所思所思在何許千
古不同時四海倘不逢吾寧獨去茲願言秉孤
貞勿爲時所欺

九日閑居

白少子全集 卷五
無錢撫秋菊向夕涼風生誰為白衣者頗識江
州名映杯碧水淨曜日丹葩明天際雁孤去草
根蟲一聲荏苒委時節裴徊閱年齡興來發長
歎意盡還一傾儉德苟不慙厚祿安可榮白首
希高賢清謠渺遺情人生亦易足何必勤無成

和劉柴桑寄袁道見懷一峯之意

當年臺城會執手多踟躕四海一為別寒暑逝
不居遠意屬羅浮舉頭望匡廬胡然金牛谷奄
忽成立墟蛻骨歸復土靈衿存為畬庶幾百代
下攀駕以忘劬袁侯西江英好德眼中無尺素
每欲近十年不作踈磨劍患不快快則隨所須
永願磨此心恢恢快劍如

和郭主簿寄莊定山

青松出喬木遙望十里陰少年不結友歲暮懷
同襟同襟問為誰定山携一琴悠然一鼓之不
辯古與今在昔經江東多士子所欽論文一觴
酒惟我與子斟豈意千載下復此聞韶音我病
不出戶何時還盍簪茫茫宇宙內與子契其深

白雲集卷之五
贈羊長史寄遼東賀黃門欽

此心自太古何必生唐虞此道苟能明何必多
讀書寂寂委山澤于于來京都斯人各有分彼
此何能踰杪秋風日清呼兒理肩輿聊為玉臺
遊言笑誰與俱屈指意中人一坐一踟躕歸來
看四壁四壁光如如聖道日榛塞誰哉剪其蕪
夫子久不見吾生何以娛常恐歲月晚况與音
問踈申以伐木章一日三卷舒

飲酒

木犀冷於菊更後十日開清風吹芳香芳香襲
人懷千回嚙入腹五內無一乖雖靡鸞鳳吟亦
有鷓鴣棲昔者東籬飲百榼醉如泥那知此日
花復與此酒諧一曲盡一杯醕酌花間迷赤脚
步明月酒盡吾當回

庚子歲九月中於西田穫早稻

遲明向南畝踈星在簷端夫出婦亦隨無非分
所安道旁往來人下車時一觀問津津不知仰
視飛鳥還邏苗遠峙夕濯足荒溝寒吾惜耦耕

好焉知世路難伐鼓收西畬黃雲被江干聊用
代糟糠作粥歡賓顏隣叟携兒來嬉戲松下關
齊聲鼓腹謳永謝攢眉歡

懷古田舍

君子固有憂不在賤與貧農事久不歸道路竟
徒勤青陽動芳草白日悲行人沮溺去千載相
知恒若新出門轉窮厄得已聊一欣甘雨濡夕
畛繁花幕春津獨往亦可樂耦耕多近隣百年
鼎鼎流永從耕桑民

製布裘成偶題寄黎雪青

海布剪黃雲嶺綿裝白雪製為道人衣方直無
周折吾老不出門躬耕慕巽缺黃昏披此裘坐
望梅村月美人遺我酒小酌三杯烈半酣發浩
歌聲光真朗徹是身如虛空樂矣生滅滅

紫菊吟寄林時嘉

嚴霜百卉枯三徑挺秋菊綠葉明紫英微風逆
寒馥芳情謝桃李雅望聯松竹懷哉種花人杳
在江一曲遺我盎中金南窓伴幽獨時無續騷

白香山全集卷五
手憔悴誰當錄且脫頭上巾茅柴今可漉

感鳥

有鳥不知名皎然閨中清育雛上庭竹衆鳥不敢凌暮雨啣虫歸喚雛雛不應以翼覆雛宿夜久巢屢驚小僕極殘忍不眠伺東榮扳巢襲其母母去巢亦傾一雛墮地死二雛尚呀嚶平明視竹根群蟻正經營子弱母護之無母何以生嗚嗚號者死宛有雌雄情入簾逼我枕爲我再三鳴此鳥初來巢卑卑近前楹我無害鳥心人謂此鳥靈終焉失所托此禍將孰懲吾甚憾此鳥感之欲霑纓呼奴撻其背流血非所矜再拜謝此鳥此意何由平

賓陽樓八景

爲丘侍御作
今存其三

穀城呼月

微月瞰高樓樓中酒初瀉旁見穀城山孰是呼月者騰騰露光景寂寂開迥野笑問圯上翁何如此山下

牌山樵唱

日夕樓上飲瞻望南山阿樵夫睨林木會意豈
在多白雲滿山徑負薪行復歌人生異出處貧
賤奈爾何

羅水漁歌

有月來照人沉竿坐羅水意與羅水深夜靜歌
亦起江湖雖云樂天地懼終否豪哉賓陽子發
蹟異姜呂

題萬碩司訓風木圖

把君風木圖識君風木心賢者不易貴遠者寧
務今嗟哉鼎與茵充足時所欽

築室

辛勤結吾廬經始筭一一廣狹更度量卑高在
平秩堂以備薦享閣以邀風日前樹貞節門後
治渭川室四垣謝粉飾牡蠣高爲骨仰瞻勢微
峻其間僅容膝既以儲簡編猶堪斂袍笏是年
秋在仲筮日欣得吉良友交助余衆工告易畢
把酒對梅花浩歌新突兀

讀林緝熙近詩時緝熙典文衡閩中欲便

道還家數夕前嘗夢見之故有是作

言笑不可親中宵馳夢想君行幾千里道路輕
閩廣忽見囊中詩區區謝官長深淵或遺珠努
力試一往微官亦何事感激章欲上行止各有
時姓名忌標榜此言誰爲傳聊以慰俯仰

將如外海看山先寄道傍諸友

吾衰何所如俯仰在一席舍旁有小水相望渺
南北靜久動乃宜住多行亦得朝往暮南還路
旁事舊識故人邀我飯半餉吾未惜東老對回

公神仙無惡客

秋興

西風振庭木虛堂夜蕭蕭攬衣起步月歸雁雙
飄飄天地豈予獨知音不可招冥心祈有合悵
望空雲霄

盛時不得意衰老徒傷悲志士曷爲爾載籍多
見之翹首面崑崙白龍有遺池振衣一千仞高
詠秋風誰

海上有一士來往不知年或就胥靡飯或投上

方眠游處各有徒孰謂世情然飲酒不在醉弄
琴本無絃借問子爲誰得非魯仲連

謝琴月惠荔枝

長夏風雨過西良荔枝熟晚有好事人提筐歸
我屋老母不肯嘗馨香聞隔宿上以薦祖考支
分及僮僕第令筐中有不畏稚兒哭爾惠良足
嘉吾親素多淑在德不在物豈謂窮口腹東坡
三百顆日啖不知足長爲嶺南人千載披心曲

贈世卿

采菊復采菊嚴霜下庭木豈無桃李顏畏此天
地肅落落枝上英未傷飡者獨持贈楚人歸投
之江魚腹

青青墻下竹冬後色如是燦燦月中花歲寒香
不匱新知語未足遠別情難置獨上江門舟北
風日凌厲

進亦人所憂退亦人所憂得亦人所憂失亦人
所憂所憂非憂道所憂其可留所憂非憂貧所
憂其可休古來嚮道人能辯憂所由去去凌九

霄行行戒深滿敬此之謂修怠此之謂流
元神誠有宅灝氣亦有門神氣人所資孰謂老
氏言下化囿其蹟上化歸其根至要云在茲自
餘安足論

可以參兩間可以垂萬世聖人與人同聖人與
人異堯舜於舞雩氣象一而已大者苟不存翮
翮竟奚取老夫嘗用力茲以告吾子文字費精
神百凡可以止一落永不收年光建瓴水
上上崑崙峯諸山高幾重望望滄溟波百川
幾何卑高入揣料小大窮多少不如兩置之直
於了處了

容珪輓

師友道久衰窮鄉無可者是非真妄間彼此不
相假所適一以偏較然見趨舍滔滔復滔滔風
俗日益下珪也何所之終身在陶冶

四雛一母乳衍衍東山岑二雛羽翼長一去無
遺音母衰二雛小中夜哀莫任感此骨肉別悄
然傷我心蕭蕭暮色起脉脉春江深百年會有

盡淚下雍門琴

容氏多兄弟西良此白眉源源來講席稍稍樹
頭籬行可鄉人敬心惟我輩知臨危僕且至忍
死待斯須

有懷世卿

仙鶴去不歸黃鸝向人語空館忽相思雲山杳
何許出門望東海默默空延佇月出潮復來鳴
撓下滄渚

時雨日夕來郊原藹新綠白雲被重崖下映寒
塘曲情結竹上言竟消井邊躅三年隔瀟湘書
至不可讀

伏枕廬山下春懷慘不舒哀絃久去耳風韻今
何如灼灼花自媚嚶嚶鳥相娛高臺夕流盼古
道行人踈

煩囂謝人境抱膝山臺居奈此枝上鳥交交春
雨餘少年耳目冗衰老不能虛安得魯連子從
之泛江湖

觀自作茅筆書

神往氣自隨氛氲覺初沐聖賢一切無此理何
由觸調性古所聞熙熙兼穆穆恥獨不耻獨茅
鋒萬莖禿

益母草

有草人不識棄之等蒿萊時來見任使到口生
風雷溲也佐未足益以蜜與醅生者得其養死
者無遺胎岐黃開本草天扎人所哀一物具一
用神功不可猜佳名夙所慕廣濟真天才

送劉方伯東山先生

未別情何如已別情尤邈豈無尺素書遠寄天
一角江門卧烟艇酒醒蓑衣薄明月照古松清
風灑孤鶴

遊圭峯同世卿作

窮居無歲年老夢得迂永托山水間東西事
遊走幽幽鐵橋花悵望未得手杖屨聊此躋微
霜正踈柳欽襟欲無言會意豈在酒滄海當我
前崑崙卓我後但談孔氏規坐失微生叟

示李孔脩近詩

昔別秋未深今來歲方晏吾衰忘筆硯月記詩
半板或疑子美聖未若陶潛淡習氣移性情正
坐聞道晚為我試讀之如君當具眼

蔣韶州書至代簡荅之

相別何悠悠梅花十寒整音塵中斷絕宵若墮
深井忽枉尺素書開讀喜不定庾嶺秋正高揚
旌下松徑君才足理郡韶民日延頸古來水火
喻子產功在鄭歲計諒有餘願聞下車令

八月二十四日颶作多溺死者

坐忘一室內天地極勞攘顛浪雷殷江流雲墨
推障高田水滅頂別塢風翻舫大塊本無心縱
橫小兒狀江門三兩詩饒舌天機上

讀張廷實主事近稿

世惟識寶人惜寶如惜子寶為物所拵念之容
色悴一朝此寶來輒復喜不已喜戚由寶故以
識為心累

贈鍼灸楊飛

昔吾見爾翁賣藥金陵市手持一寸鍼鍼落病

者起我主大行人翩翩酒相值京中多異客飛
蓋若流水一峯挾一囊有藥能醫世時當引疾
去東西各飄逝歲月忽復多囊括鉞亦廢君來
還見予俯仰相悲喜何期二紀下重睹無雙技
瞻彼老定山風波五千里金陵多舊游存歿寧
復記人生若浮煙為君語如是

正月二日雨雹

是日雨水節

雨水不雨水雨雹胡乃然小者如蓮實大者如
彈丸仍聞隔江言有雹大如拳吾

君古帝堯神功格皇天雹徃而霰來無乃為豐

年

後二日雨霰

五日雨霰

北風卷長雲晨光坐來滅映空絮忽飛誰謂越
無雪

元氣塞天地萬古常周流閩浙今洛陽吾邦亦
魯鄒星臨雪乃應此語非謬悠

讀張地曹偶拈之作

拈一不拈二乾坤一為主一番拈動來日出扶

桑樹寂然都不拈江河自流注濂洛千載傳圖書乃宗祖昭昭聖學篇授我自然度

不習書絹殊失故態已付染師作碧玉老人卧帷矣呵呵拙詩紀興錄上顧別駕先生以博一笑

用絹不用裡下筆無神氣何況闢其行大小難更置能書法本同萬物性各異茅君跡而野拘拘用乃廢我且毛穎之安能免濡滯書成始大慙未忍水火棄持以付染師經營卧帷事作詩

告先生共契茅君理

贈黎秀才

月行在青天月影沉碧水誰為弄影入吾與黎生耳黎生青雲彥偶值薇垣使明日還端陽贈君惟有此

寄李子長

仙城李子長髮短不及寸家有覓栗兒時無郭元振經年斷往還使我勤問訊寧知造化心天地無情盡

祝融我當徃徃處還自然未徃亦由我安知不
是仙是身元有患天道豈無緣難逢俗人說可
為知者傳

卧遊羅浮

四首

登飛雲

馬上問羅浮羅浮本無路虛空一拍手身在飛
雲處白日何冥冥乾坤忽風雨叢筍將安之徘徊
四山暮

度鐵橋

一度一萬仞飛空本無鐵何名為飛空道是安
排絕夜久天宇高霜清萬籟徹手持青琅玕坐
弄碧海月

下黃龍

天風吹我笠吹下黃龍頂兩手提笠行不知白
日暝赤松見我笑却立千丈影童子問赤松雲
深各不領

望羅浮

山大必有靈土高豈無異翠浮幾千丈日月東

南翳我尋五岳來未問仙家事絕頂望九州衡
山正西峙

贈周文都

十年兩別君一別一回老問藥朱陵遊吾茲恨
不早平生憂樂心相對各傾倒遠別望眼昏浮
雲不堪掃

寄題嚴州嚴先生祠壁

既上桐江臺復弄桐江釣不食桐江魚不怕嚴
光笑衣巾人笑儂羊裘終未了堂堂范公碑今

古稱獨妙

寒菊

菊花正開時嚴霜滿中野從來少人知誰是陶
潛者碧玉歲將窮端居酒堪把南山對面時不
取亦不舍

寄賀柯明府

夷狄犯中國妻妾凌夫君此風何可長此恨何
由申仲尼憂萬世作經因感麟往者宋元間適
逢大運屯仰天泣者誰屈指張陸文臨事誠已

白沙子全集 卷五
踈哀歌竟云云一正天地綱我
祖聖以神缺典誰表章厓山莽荆榛寥寥二百
年大忠起江濱慈元廟繼作爛映厓山雲近者
陽江尹一念何精勤作祠比厓山兩廟存三仁
大封赤坎墓昭昭愜衆聞深悲魚腹冷一躍海
門春厓海風波隔陽江面目新自然聲氣應坐
使風俗淳短卷心先賀神交夢每親琢詞告萬
世老病敢辭君

偶書所見

崖傾百丈泉直下注東川翳流起大春覆茅於
其巔一爲利所驅取便世爭先漢陰喻桔槔所
見無不然嗟哉抱瓮心古道何由全

謝鄧督府惠交藤酒至

使來遺一樽百金不願易遇藥如遇仙竒方聞
在昔卓哉李文公作傳甚詳悉感公嘉會心何
以酬公德但恐命不齊服藥也無益

曉枕

天地無窮年無窮吾亦在獨立無朋儔誰爲自

然配春陵造物徒斯人可神會有如壽厓者乃
我之儕輩永結無情遊相期八紘外

題端陽李太守甘霖重應卷

嶺南名刺史端陽有成績端陽問為誰長沙垂
令德曰惟長沙公善非一代積去年苗欲稿公
寢不安席手拈一炷香須臾見昭假今年事復
然斯民忻目擊甘霖雨下土郊野望四塞滂沱
及隣壤秋田足民食公惠寧有心斯民感公德
口頌遂成碑舉手還加額安得長沙公為我大

邦伯坐令十郡內廣布陽春澤閭閻興孝悌四
野無盜賊共育太和春緬緼謝反側

偶得寄東所

知暮則知朝西風漲暮潮千秋一何短瞬息一
何遙有物萬象間不隨萬象凋舉目如見之何
必窮扶搖

登高未必高老脚且平步平步人不疑東西任
四顧豈無見在心何必擬諸古異體骨肉親有
生皆我與失之萬里途得之咫尺許得失在斯

須誰能別來去明日立秋來人方思處暑

和羅服周對菊見寄

春來苦不早春去常願遲嗟哉造化機萬物安
得知歲晏菊始吐鮮鮮在東籬不污桃李塵永
續徵君詩

龜山夜月

萬古此龜山萬古此明月開簾望龜山岱宗固
無別但恐山多雲風吹亂人睫

馬牙香

爐中煨白朮坐上是青天綺季奕未畢夷齊上
西山沉檀皆下品欲語不同年

題心泉贈黃叔仁

夜半汲山井山泉日日新不將泉照面白日多
飛塵飛塵亦無害莫弄桔槔頻

贈伍弼歸觀

諸生胡不歸九月望庭闈山北山南道紛紛落
葉飛呼兒巾木榻謝客掩荆扉不盡來時約堪
沾別處衣

真樂吟效康節體

真樂何從生 生于氤氳間 氤氳不在酒 乃在心
之玄行如雲在天 止如水在淵 靜者識其端 此
生當軋軋

得何時矩書

良友惠我書 書中竟何如 上言我所憂 下述君
所趨 開緘讀三四 亦足破煩汚 夫夫立萬仞 肯
受尋尺拘 不見柴桑人 丐食能歡娛 孟軻走四
方 從者數十車 出處固有間 誰能別賢愚 鄙夫

患得失較計於其初 高天與深淵懸絕 徒嗟吁

五言絕句

曉起

偶然風折木 村犬吠成群 此事真難免 問君聞
不聞
辛苦南隣白 遠鷄方一鳴 夜來風極急 吹斷到
窓聲

冬眠不覺曉 開門見白雲 雲中何所有 童子兩
三人

湖西九巖爲一峯題

光霽巖

風月佳名在乾坤浪跡空從來巖下客祇與異人逢

翠華巖

來說湖西者不及華山頂誰知巖中仙解作石柱屏

清風巖

聲從竇中來可以塞天地借問采薇人便知風

動處

府教巖

宋教授羅開禮所棲之地

府教英靈在虺蛇不敢居從來巖上月只是照虛無

極清巖

聲名野老畏草石貴人爭剗却巖中有悠然是極清

英公巖

今名鍾英一峯所更

翠掩千尋洞青窺一竅天人間無絕境不要問

桃源

扇和巖

即石柱岩

山骨短圓稜初疑削木成
乾坤藏一柱猶得鎮巖扁

卧龍巖

岩有龍潭龍床床之旁有石仙人

龍出潭水空龍歸潭水黑
君從龍床來誰在龍床側

月巖

閻閻月墮地忽在天中央
墮地人不覺中天照

四方

題慈元廟

慈元一片石長留何處山
崖門潮日至雪浪飛天關

題畫

金籠鎖鸚鵡山木縱斑鳩
巧拙知誰是天機不自由

題畫松泉為張別駕

松乃木之雄公亦人中龍
何須看畫本千丈在

白雲子全集卷五

胸中

對酒

放歌當盡聲飲酒當盡情門前烏柏樹夜半子規鳴

荅立侍御送酒

石齋書本拙酒力巧相扶欲報霜臺貺山中一物無

雨後

久雨妨行樂花前望玉臺人間見花樹不似玉

臺開

村步雜書所見

踈花明委巷細雨得今晨點綴非無意紅芳不
是春

公飯何曾接衣冠不作人齋中有名酒分爾一
杯春

晚食南山稻堂堂媿野人平生無可說一個白
頭親

村笛轟牛背山花結帽頭騎牛勝騎馬曲坂没

白雲子全集卷五

郎愁

趁罷江門市商船奪港歸溪山愁引望城郭更

須知

日照南浦口初喧江市人小奴性嗜酒出飲畏

吾真

戲贈求書饒大中還江右

書法一家成風波幾月程孤舟愁度險薦福有

雷聲

代簡荅方伯彭

大賢望於人徃徃非獨守難將一人意滿足天

下口

氤氳復氤氳東君欲放春梅花何太早早報越

城人

絕句

清曉乘驢出北風吹澗藤沉吟澗邊道天意莫

留行

行止皆前定出門愁北風西郊不成徃昨夜夢

途窮

贈鄺知縣雲卿別

又送夫君別芙蓉花可憐水深難折贈留伴老夫眠

與諸友夜過貞節橋

人影荒橋下蟲聲滿月中連翩雙大袖聊得颺溪風

讀張主事近稿

雨中月不見雨霽月還多雨被風吹去無風月奈何

對菊

浙浙西風至為秋未有涯江邊聊一醉信手得黃花

不落龍山帽何須九日風更煩將小雨向晚洗花叢

春事歸桃李西風響未休長官三徑晚丞相一

坡秋菊坡先生崔與之也

好個重陽節誰家酒不賒果然殺風景吸茗對秋葩

天地花無數寒花色乃佳古詩拈未出除是長
官來

九月木犀花盛開偶成寄賀黃門克恭
香逐西風起氤氳入杳冥不知從此去幾日到
遼城

洗竹

風引一叢竹搖搖四五莖橫斜今洗盡道眼者
圓成

洗竹洗荒枝洗心洗狂馳老夫無可洗抱膝洗

吾詩

一洗一回踈相將洗到無客來莫問我北壁有

團蒲

曉起

籬頭過井水不打隔齋門手握南陽布纏頭數

竹孫

老不愛春華一籬孤負花胡為聒我枕穉子打
朝鴉

自有無情蝶孤飛不傍花白頭聞見少閑動羽

白沙子全集卷五
魚蟲嗟

贈張叔亨侍御

天下元無事勞勞我有心相携沙上語山月二
更深

觀群兒釣

群兒齊弄釣其一偏多遇餘三未得手投竿來

上樹

仰面看垂釣失脚墮危石若是謫仙人水中眠
亦得

閔丁知縣傳

模樣從看拙丹青只寫真乾坤如許大具眼豈
無人

夢中作

翩翩復翩翩天生我亦仙江山足風月吟弄到
何年

夢丁彥誠

與君生死別三四歲星周夢語分明記相悲各
點頭

對竹

竹色上牆多南薰綠幾何時無分付處野鳥自來歌

窗外竹青青窓間人獨坐究竟竹與人元來無兩個

北風卷頑雲陰晴安可卜海月出漸高獨照南窓竹

隨筆

苟能深積累豈患無高譽如何世中人甘心鐵

爐步

一歲十匹衣一日兩杯飯真樂苟不存衣食爲心患

人不能外事事不能外理二障佛所名吾儒寧有此

斷除嗜欲想永撤天機障身居萬物中心在萬物上

小雨閉空齋青青竹映堦道人終日靜一枕到無懷

白沙子全集卷五
子美詩之聖堯夫更別傳後來操翰者二妙少
能兼

梅下雜詩

朝凭曲欄西暮凭曲欄東
欄裏梅花好看花了
病翁

久共寬閑地濃薰自在香
折來何所寄只是寄
遼陽賀黃門欽也

贈人

萱親垂九十遊子尚天涯
莫羨仙城棹南風夜

引旗

讀易偶成

南乎不可北東乎不可西
自從孔孟來君子恒
處睽

張克修別駕約遊羅浮

重疊四百峯鐵橋在何處
莫將別駕來同到飛
雲去

張克修見訪

滄溟幾萬里山泉未盈尺
到海觀會同乾坤誰

白沙子全集卷五
眼碧

題劉鑑松

劉生於寫松能以酒力遣酩酊氣正豪蒼龍自舒卷

題扇

風檣杓欲折五月瞿塘過何如此庵中紅日抱膝坐

張帆海上回帆掛鐵橋樹鷺起白蝦蟆跳上飛雲去

贈胡地官次韻吳明府獻臣

有一范仲淹人將重名節馬上地曹郎翩翩起吾粵

引滿花下杯延緣坐中客醉下大袖歌孰云此門窄

題林府尊壽家慈書後

馬尾緣封事魚緘壽老親古今誠一揆藉用白茅人

題顧通府集古倡和卷後

滿眼珠玉光高才極雄騁對之不敢言稚子來
弄影 出化書

訪客舟中

船頭酒多少船尾閣春沙恰到溪窮處山山枳
殼花

夢後作

策杖獨行游青山一何深道逢采藥人問我松
脂林

見月時一吟夜涼天稱心回頭望東川流水無

古今

幻迹有去來達觀無古今長嘯人不聞山風吹

蘿襟

楊柳餘朽株梧桐但踈陰小卧不出門不知秋
已深

贈鄺筠巢

山中一夜秋老屋居然別丈人不飲酒共坐看
明月

客乞題隨時子軒

無雨笠且置未晴蓑不捨蓑笠用不窮我是隨時者

題扇

東艇拍西艇小拍庸何傷夕風起驚濤艇艇爭
低昂

一夫眉正揚一夫髮盡禿日暮船正歸前江風
拔木

蔣韶州世欽挽詩

治郡聲名遠如何是我詩青山韶石老回首盡

交期

往事形骸外如今一夢休曹溪分我茗猶說蔣

韶州

周京聞母喪歸弔以是詩

萬里無歸耗形將一木親遺言入肝肺真得太
夫人

題南窓壁

南風吹面處不省是南窓此意無人會乾坤落
酒缸

雨後示劉宗信林時嘉

一雨變新涼炎埃洗除盡廬山昨夜燈已照劉

宗信

秋來亦滯潦日月閱其光乾坤丈夫事千古空
堂堂

漫筆

幅巾是秀才袈裟是和尙伎倆人共知長篇事
標榜

神泉八景為饒鑑賦其四贈之

太極涵虛

混沌固有初渾淪本無物萬化自流形何處尋
吾一

浮螺得月

道眼大小同乾坤一螺寄東山月出時我在觀
溟處

茶山分香

江門白藕花我榻廬山頂君若去茶山茶香復

誑頌

神泉漱玉

焦明亦是鳳縈焰只疑燈安得石上泉爲洗世
中盲

九日

霜前淡淡花瓢內深深酒今日陶淵明廬山作
重九

同俗不同俗山杯映秋菊仍聞席上歌不是人
間曲

歌舞重陽酒今年有去年山中八石榻榻榻是

回仙

讀李評事承芳文

著論必無同乾坤孰此容人扶周孔教用世且
無功

一囊包宇宙到手問綱常所以東坡老嘐嘐薄
武王

不薄論交意因書稍稍知還將天下眼照破老
夫痴

送劉宗信還增城

白少

全集

卷五

四九

夜宿黃雲塢秋登碧玉樓歸時一片石見月過
羅浮

山到鐵橋西青天一角低送君高處望天與帽
簷齊

菊花笑我前梅花撩我後問花花不言駐楫增
江口

山人偶出村送客村南道江山風日佳歲月軋
坤老

贈張叔亨侍御出按雲南

到治一萬里使君行莫遲梅花開樹樹不是向
南枝

碧玉樓晚望

樓遠見諸山目短意不盡天陰水恠興碧玉所
以鎮

贈克脩別駕遷梧州守來別白沙贈之

甲兵滿一舩江門來訪別贈君欲何言笑把梅
花折

少年恣行遊老病徒拘綴送君今夜心還到蒼

梧去

贈陳護湛雨

說到忘言處無詩可贈君許將臨別意一點落黃雲

君若問鳶魚鳶魚體本虛我拈言外意六籍也無書

送李子長往懷集取道謁張梧州

春棹去江門泝流焉汲汲點筆煙外山歸來看懷集

不聞端別駕敬士如子長問道蒼梧下登歌刺史堂

贈范能用

溽暑不可處清風時滿樓如何傳別教衲被坐蒙頭

阮籍見孫登只聞孫登嘯針在繡不傳繡傳針不妙

西良容倫餽荔枝非桂州本色戲以是詩口溢桂州漿眼定西良色我是荔枝仙何人解

漫得

壽南山翁七十

朝看亦南山暮看亦南山南山南山長不老聊以永君年

萬株松上花千日杯中酒兒孫戲膝前一舞一回壽

贈太守黃公

水白端陽色梅紅嶺上花春風迎度馬秋月候歸槎

題文相陳俊卿畫像

御史鐵爲肝張秦掛舌端至今湖嶠月猶作太師看

題宋狀元陳文龍畫像

文章甲天下氣節愧當時公母亦滂母千秋名共馳

梁惟正鄧德昌往來白沙途中遇盜惟正以舟泊淺奔于岸避之德昌抱書立船頭盜不加害戲贈以詩

白沙先生集卷五
道逢惡少年打破兩生敬試問鄧德昌何如梁
惟正

曉枕偶成

采義非采薇食薇不食粟遙遙望西山千古差
峩獨
西北多竒峯雲深杳難認漢廷無謀臣黃綺皆
真隱

度危橋

事至絕安排放脚踏高崖如何謝上蔡旦旦習

危堦

贈閔督府還陞南京秋官

司寇今欲行病叟山中卧如聞經畧憂未向春
風破

吾聞用世心中外無異等何由一送公細話東
西省

贈林府尊

彼曰春泥人此曰人泥春晨朝出相送向夕望
歸輪

贈李克常

桃花被東岸江水日日深
贈君豈無言亦有花
水吟

感事漫述與王樂用

丁侯為縣時不與謁者通
古稱奉法吏秉筆性
至公

留情重留情獄事果難明
無輕赤子命為官急
書程

士而未聞道未免為物撓
卓哉安心人外事若
無好

舍已莫委命從人莫登山
嗚呼羅一峯逐善如
轉圜

寄淮上秋官姜仁夫

問客淮南道停舟過此無
廬岡一端帛為我謝
仁夫

荅王按治求乃翁挽四絕

樂善堂

樂善機應熟垂聲教不窮
江山無盡意猶在典

刑中

月湖別墅

水月非無主長懷別墅秋湖光一萬頃端為此
翁留

可怡亭

此地還成趣庭柯幾度板亭中人不見月照門
前山

吳山壽藏

山隱一坏土人思百代傳無窮身後事未若子

孫賢

題丁長官廟

何時重借寇此地一桐鄉四海諸侯望千年一
炷香

會翠亭

東池久寂寞會翠得佳名小詩拈未出去尋王
右丞

吳主簿詩主簿名則宣平人吳黃門仕偉
之父也

軍門止殺 按狀正統己巳閩城賊流毒
處民蟻附 朝命大司馬孫公原貞夷之
知先君謀畧禮致幕下贊畫百協邑有三
巖民多避難於上徧脅之衆亦有聞義而
歸者命先君統之推誠示信無不感服寇
平孫又欲行法先君泣曰殲厥渠魁脅從
罔治矧既歸命殺之不祥竟得免奏功授
鮑村巡檢

泣諫天應見坑降地不知自然殃慶至天道不
須疑

過與弗取 按狀景泰間分麗水為宣平
復命先君董其役伐木於山役力於民期
年而功成孫曰難平邑作皆爾之能餘木
尚多可治爾居先君辭曰功成於上愚下
何有明公芟夷大難布德於瘡痍之民一
方獲安某也受賜多矣且官物不可入私
門未敢如命孫益敬之

百世高公綽千金謝魯連胸中無雅度勝事竟

誰傳

卜築西溪 按狀鮑村任滿陞華亭主簿
愛民如子處國如家凡有議讞多稱平焉
且疏子下民濬河渠禁賄賂等十事于
朝皆賜可松之地狹于蘇而漕數反出其
上又爲民陳情得減北運一萬石事載雲
間志在松十年勤勞罔懈僅五十而二毛
蕭然嘆曰天道四時功成者退庸可不知
止乎遂乞致仕而歸卜築西溪之上

主簿能經濟中年未乞身西溪看卜築知是晏
眠人

寄嚴州林郡博緝熙

萬紫千紅外如君故可人桐江都滿樹海驛尙
含春

寄東所

春江正滿時未具衡陽楫還携鄧俊圭江門與
君別

夢林緝熙

酒闌歌不起老病無奈何夢滿桐江雨相對不
成歌

山樓本無夢我自夢嚴州嚴州誰夢我白雲天
際流

荅柯明府

終秉循良筆難逃俗吏嗤不知三考績課最竟
何須

贈雷少尹還汀州

桔槔滿天地抱瓮古來難哦松非俗吏哦松不

在山

覺後

馬圖不出河鉛刀不割痴上下幾千年拚卷一
沾衣

謝姜大叅惠酒

名公遺我酒洗琖自開甞何以酬佳貺商歌示
不忘

武進八景為徐嶺南紘作

龍山春雨

長夏龍山曉人間望忽開長風捲雨去復送雲
歸來

笠澤烟波

何處煙波好公乘笠澤槎我泛江門月乾坤共
一家

龜山夜月

夜半龜山月能開萬頃秋試從開處望照公湖
上樓

陳湾疊嶂

丹青

陳湾疊嶂新我詩君莫笑還屬姓

陳人

薛堰通津

薛堰歸何處披圖想具區古來探本論無欠也
無餘

亭山夕照

亭山不可踰華頂凌天台卑高本自形夕照從
西來

廟墩靈跡

白沙齋集卷五

五九

抹溺如救火造次遂捐生金陵人去遠拘鬼不來爭

板橋書屋

板橋藹吾伊名稱已蓋世誰云龜山月不照新堂睡

荅無錫諸友

碧玉通書久青天感興新江門動秋思聊因寄故人

送米與何侃

野饌家禽小村春晚粒香莫言無厚餽吾意在分嘗

九日用舊韻

新笏壓兩壺落英携滿袖我非陶長官廬山還九九

送黃希顏之太平推官

有官五馬後無官百揆前不將前後看須着有無言

題高璠詩集

神交傾蓋上心遠著詩時無由向人道人亦豈能知

紀夢

一別三十年相逢不相識骨肉為路人春風淚沾臆

寄潘留鶴

有時牛亦坐何處鶴還留天台二萬丈誰踏紫冥謳

題伍光宇碑陰

松柏孤高處春風更可尋如君有賢配昭德在碑陰

荅廷實有懷見寄

白雲滿中野此地即衡山莫擬西來棹須防失路難

謝孟芳遺腹生男

充閭人所喜今日愴還深憶我初求乳誰知母氏心

贈吳惠州繹思

皂盖朝 天闕青山道故鄉高堂開壽筭酪酏
別莆陽

鳩鵲

初日上茅簷江邊有畫舫八哥莫饒舌有

詔許歸眠

鳩鵲能言鳥能言我恨無白頭書小楷不及蔡
君模

九日諸生携酒飲白沙醉中和荅

老病得狂痴謹呼九日期自補登山屐誰供把

酒卮

諸君爲飲會老子不須期盡數籬前菊一花拈
一卮

九九八十一去來無窮期元精爲我酒大塊爲
我卮

對酒用九日韻

秋花新氣味秋月舊襟期獨唱花前曲閑傾月
下卮

行年三十許已卜入山期處處開花徑牀牀是

酒卮

飲酒何必多醺酣以為期不辭亦不勸三卮或五卮

作詩尚平淡當與風雅期如飲玄酒者器用瓦為卮

梅花

水陸花無數南枝愛殺人遙持一杯酒江上酹花神

逢人問除日君得地曹郎此意憑誰寄梅花隱

石床

謂東所也

九日懷麥岐時往江東未返用前韻

東西填脚債已過一秋期今日拈花處思君第一卮

菜羹何處酒勝日與君期漁翁歌獨釣江月夜明卮

六言絕句

周鎬送白菊乞詩

陶令黃金遶舍君家白玉滿園千古清風廬阜

白少子全集卷五

幾叢細雨江門

微醉不須酩酊半開莫待離披安得季芳與語

相思欲寄一枝

白菊偏宜素髮青山只對蒼顏燕罷秋香滿腹

風吹不到長安

邀丁縣主賞菊

社會賦詩不就公當酌我杯盤小酌倘尋舊雨

東籬還對長官

題枕

太華峯頭一枕千秋萬歲通靈不怕惡蛙驚睡

鼻端三月雷鳴

漫興

風洒數莖白雪月臨一丈青筇餘事歸詩卷裏

殘年放酒杯中

景斜瓦碗方食日晏柴門未開五柳前身處士

一瓢今日顏回

晨光沼上魚戲夕陽村邊鳥來東隣小兒識我

一日上樹千回

白少子全集卷五

六四

翠烟綠樹歌鳥青水紅蕖浴鷗笑問五湖范蠡
風濤何處扁舟

七言絕句

伍光宇卜室白沙爲讀書之所

君此卜居君亦足空村無人山多木參差芭蕉
麗晨旭新葉新心迤相續
競晨登登聞隔竹東隣老人事幽卜甕甑瓦盆
不供俗我不到門此翁獨

荅段錦衣惠藥

藥來詩往共誰忙野老無金與段郎泉石旌旗
俱在眼不應泉石獨膏肓

聞攬山近有車馬之蹟因贈緝熙并寄竹

齋夫

白日傳呼攬翠崖誰家玉樹碧雲埋只疑冬酒
開松逕定有山靈怨竹齋

偶成

墻角經春卧短筇千秋塔骨不如公科頭坐轉
茅簷日閑看蛛絲蕩午風

白少子全集卷五
夜坐與童子方祥慶話別偶成
晚飯跏趺竹几安秋吟涕泪閣燈殘一詩可送
方童子千煉不如莊定山

往潮連人事

獨速蓑衣舞我航數家煙樹隔瀟茫不將起例
供人事祇為看花也未忙

柳渡月下承茗溪翁約賞中秋月於潮連
年顏欲比茗溪老酒棧同揮夜月圓來共主人
秋半醉更回楊柳渡頭船

次韻張叔亨侍御見寄

酒舫當年興未涯清宵人語白鷗沙如今縱有
相思夢不到長安御史家

看柳

淺塘低竹小坭村黃土墻高白板門望見西頭
楊柳樹行人都訝是桃源

雜興

曲肱深閉倚山閣照眼不堪臨路花一身老去
何須出兩脚朝來只欲麻

倚檻纔看一兩花不堪終日雨斜斜先生已結
僧趺坐還與人間管歲華
白日幾時生羽翼金丹負我不神仙東家茗碗
頻分啜兩腋清風也可憐

溪橋晚立示諸郎

溪邊明月掃不去竹下清風時一呼天與乃公
供打睡莫安橋板引樵漁

齋大父忌作舊居在道娘墳東

道娘墳西近官路朝朝暮暮行人多世事百年

渾不省滿堂賓客竹枝歌

贈釣伴

短短萋萋淺淺灣夕陽倒影對南山大船鼓枻
唱歌去小艇得魚吹笛還

得陳德雍書年九十餘矣猶有願學之志
越客初披手翰新天涯暮雨欲沾巾可憐一片
長江水日夜東流不待人

望頂湖山

客子正歌山鬼句篙師欲進頂湖船遙看落日

蒼梧外獨立橫槎古寨邊

夜過三洲巖讀濂溪題名示諸生

山容寂寞紅葉老江月照曜青天高題名夜半
尋周子秉炬相隨愛爾曹

歇馬大徑山

數家烟火隔林塘一樹寒花晚自香黃葉塚頭
聊歇馬鷓鴣聲裏近斜陽

華盖仙蹤為謝布政作時謝已物故

華盖山頭雲起時群仙雲裏坐彈棋謝公不用

登山屐借得千秋一鶴歸

東軒獨坐

桃花寂寞梨花開山中薄酒三五杯村西有客
可人意風雨今朝期不來

虎夜出

虎頭縋淵雨即下山中白額還遭打今年雨足
汝不知稍出人間食牛馬

次韻趙提學見寄

蒿萊封徑不腰鎌長夏山齋睡正甜風送歌聲

滿天地驚回殘夢雨
滿天地驚回殘夢雨
老太行藏敢不疑
老太行藏敢不疑
曉川紅日睡醒時
曉川紅日睡醒時
昨宵共對
昨宵共對
崖山雨如此
崖山雨如此
乾坤那得知

古有所思

采采紅芳日欲斜
采采紅芳日欲斜
盈盈珠淚落天涯
盈盈珠淚落天涯
東風忽攪
東風忽攪
籬前樹惱亂春愁
籬前樹惱亂春愁
不為花

卜日修外海赤泥嶺祖墓值雨

冬雨墳頭蒿已生
冬雨墳頭蒿已生
年年披草祭清明
年年披草祭清明
晚風吹落
晚風吹落
携鉏艇又聽
携鉏艇又聽
轆轤隔水聲

與景星夜坐

撥悶無人致酒瓶
撥悶無人致酒瓶
哦詩燈下一郎清
哦詩燈下一郎清
夜深笑拍
夜深笑拍
胡床語忽亂
胡床語忽亂
堦前落葉聲

西樵山下感舊

西風吹老錦巖春
西風吹老錦巖春
遺跡荒涼此水濱
遺跡荒涼此水濱
雲氣不遮
雲氣不遮
西望眼青山
西望眼青山
剛對獨歸人

西樵山前暝鶴歸
西樵山前暝鶴歸
縞衣雙拂錦屏飛
縞衣雙拂錦屏飛
淒涼夜半
淒涼夜半
孤舟客一聽
孤舟客一聽
遺音淚滿衣

德孚先生留此眠
德孚先生留此眠
南山揮手白沙船
南山揮手白沙船
伍光宇號
小南山

白
沙
子
集
卷
五
三
五
江山此日三人別誰道人生無百年

示建旌節亭役者

照曜乾坤功不小此風此日更須扶泮宮畚土
皆民力不共城卽一例書

次韻趙提學留別白沙

列炬溪邊樹影斜隔花遙迓使君車酒杯欲別
微風起吹動馨香下柳沙

蕉麗望羅浮

翠錦爲山白錦雲畫工傳影不傳神今朝蕉麗
江頭望魂爽何處得傍身

黃連澹卽事

青草橋邊船未歸曲川微雨暗荆扉江村盡日
無來往夫在東臯婦給炊

上帆

蜻蜓翅短不能飛款款隨風墮客衣此是天人
相合處蒲帆高掛北風歸

初晴

初晴樓上燕飛飛樓下歌人白苧衣一曲未終

花落去滿林啼鳥送春歸

落花

落花半落流水香鳴鳩互鳴春日長美人別我
在江浦欲來不來空斷腸

清曉

清曉有人來款扉風吹衫袖白披披昨宵雨打
山窓破莫怪先生下榻遲

對酒

半開半謝花相催江水東流不復回扶杖江頭
看花樹不知笑向酒家來

喜生姪

兩翁筋力少翁衰竹杖先堪付若兒只恐暮年
詩更逸出門須背錦囊隨

新設紙帳軒中

如雲白紙罩方牀翠簟眠穿我固當世到葛天
終不遠先生枕外即羲皇
堦面苔侵牡蠣牆小軒容易領年光只從今夜
床頭月已照先生鬢脚霜

送鍾地曹入京

十年自汗不曾乾枕上殘書白首看莫道無心
與君別樽前更覺別君難

感事

人間骨肉薄秋雲一事朝來不忍聞何處青山
封宿草欲將衰淚灑孤墳
平生交態如兄弟此日悲歌聞路人欲寄秋風
兩行字九原無雁獨憐君

宿倪麟所石榴花秋開

老蟾半影秋如水曙角一聲霜滿街白髮山人
到城府石榴花下借眠來

催諸友九日詩課

九日樓前客令新黃花愛酒不饒貧勸君火急
交詩課纔到明朝罰主人

題杜少陵小影次韻柳文肅

孟子詩肩高聳山杜陵談笑古風還世間還對
憂時畫美酒花前已破顏

與舊童子

神樂燒茶伴老夫昔時童子今生鬚青春過眼
如流水白雪滿頭非故吾

謝惠酒

白髮蒼顏老石齋出門秋思滿天涯極憐紫酒
逡巡有不負黃花點綴佳

五月二十七夜颶風作屋漏

燈殘四壁漏痕斜老屋回風落細沙乾坤更有
晴明日為報家人莫怨嗟

題畫

赤壁磯頭天欲曙縞衣和夢掠舟西欲尋故處
何由見長恨今人畫亦非

題月溪卷

月出東方白漲溪溪翁行樂溪東西相思欲過
隔溪去南斗無光北斗低

贈周鎬兄弟

周生兩馬齊兩鞭京指長安鎬在山今夜尊前
看秋月明年秋月憶尊前

秋日

山河一望仲秋前
楓葉初黃水半川
路上行人不歸去
北風吹爾過殘年
木犀未發盞蓮空
小女來方剪綵工
不信衰榮是天道
覓花無處怨西風

閱馬氏均田文

王侯尚愛橐中裝
何況田家第與兄
孟子未知人事獨
將仁義教齊梁

贈鄧栢林其人貌似伍光宇

南山面目偶然同
又向人間見此翁
碧蘿密

一杯酒猶勝良宵夢裏逢

此老若是石曼卿
此山便是芙蓉城
高歌獨控青驪去
是有風流萬古情

喜雨

滿眼珠玉不足珍
甘雨一灑萬家春
昨日蒼頭木洲至
又道木洲饑殺人

將如東莞聞途中盜發不果

扁舟東過扶胥口
一日二日之便風
何故三旬不成往
仰船岡下賊旗紅

白雲子全集卷之三
題朴軒

葛洪亦號抱朴子安知朴翁不是仙莫將甲子
編年看人道翁生大撓前

題應憲副真率卷

今古一杯真率酒乾坤幾個自由身春風回首
黃巖會醉插花枝少一人

茶園曲寄治香櫃袁暉

峽東灣灣一水長商船無日不蘇杭千村萬落
無窮樹盡是袁郎櫃裏香

插花

巖前上馬興難挈卯酒三鍾帽半斜兩鬢馨香
齊插了賽蘭花間木犀花

訪山家次韻

樛枝逕口即迎馬語鳥籬前妾掃雲笑殺主翁
忙出戶手提筐果喚厨人

清泉煮巖愛山家夜飲西巖望月斜澗底白雲
留不住半隨紅雨落天涯

蕭黃門書來見責久無書用舊韻答之

諫官一字照天涯南海年年問釣沙滄波不與黃門信笑殺龍鍾百姓家

平鄉伯陳公以紫茄花絹為家慈壽詩以謝之

吳統衫色紫茄花老親著時衆口誇小兒奉酒歌七字持獻軍門表拜嘉

景雲偕范規海上割稻
犬子給炊海上舟范生打槳兩同遊田中割稻家中望逢著諸仙莫浪投

招訟者歸

越王城裏塵隨馬刺史衙前吏喝人此日王孫不歸去舊遊芳草可憐春

中秋期諸友不至
山妻有錢肯沽酒諸友賦詩期不來范生也逐吾兒去一夜清光對玉臺

贈鄺載道之淮陽別駕前御史謫黃巖

十年花縣眼中人別駕淮陽又幾春曾共烏臺高十仞鄭郎今著白綸巾鄭紀也

感事

齒本生來不著唇
呶呶衆口劇鵝群
鼻雷自炒元城耳
夜半鍾聲那得聞

木犀四絕寄倪麟

正月山桃委地紅
柳塘還捲落花風
木犀一樹渾堪賞
盡日相看煙雨中

風雨歸來問小奴
藥欄花架費人扶
黃昏雨歇茅簷月
只有木犀對老夫

春城無日不思家
風雨經旬損物華
竹色四時

長不改平安先報木犀花

風吹雨打只傷神
白首龍鍾尚愛春花意
未應嫌老醜十年前
是種花人

題兩山居士卷

墨水翻騰作巨川
兩山何處洒雲煙
醉中亦有臨池興
悵望名家不敢言

題東所卷

東所詩成月滿衣
乾坤無語鬼神悲
郎今欲到飛雲去
說與兩山居士知

問鄺珙病

鄺生病肺今何如
猷歲初驚得手書
我有丹方欲傳與
小梨床上半跏趺

次韻陳冷庵僉憲見寄

擊壤聲中酒國春
海風吹老石邊身
桃花幾樹衡門下
我是唐虞一輩民

乾坤畫筆久荒蕪
誰作臨江五老圖
聞道遠師將結社
華巔猶得照鄱湖

五十四年居海濱
偷將水月洗心塵
今朝偶得

西江使溟海猶堪把贈人

別意

江閣醒眠秋正涼
西風殘漏轉離腸
不知天道平分未
已覺人間一夜長

悼林暎

一日之雅亦爲哀
鍾淑相隨入夜臺
此生未了男兒事
也向扶胥打坐來

木犀開時江右李
士達劉希孟已去
容貫范規江浦未
還因有獨賞之歎

嶺北書生嗟去早江東遊子惜歸遲重陽將近
無風雨正是木犀初發時

先子忌日作

生來只見山頭土祭諦惟聞月下蟿五十四年
天頗近諸孫羅列拜成行

題畫

茅簷秋颭酒旗風舟入蕪葭月半籠醉睡不知
家遠近醒來依舊五湖東

寒山鍾近不成眠人在姑蘇半夜船何處明朝

正堪望吳王宮苑草芊芊

金陵城西趨市郎負戴不厭江路長百花橋頭
換美酒歸與漁父歌滄浪

古耶道中有懷

翠煙浮壠麥初齊社樹青青獨鳥啼何處相思
不相見木綿花下水門西

小湘峽食嘉魚

兩山斷處小湘峽十月嘉魚出水鮮引滿阿儂
生日酒微吟空記屬牛年

自三洲還至祿步村

江流夾束午風柔城郭歸來祿步舟惆悵碧桃
歌舞散黃茅烟裏一鞦韆

過清遠峽

行人初上峽西頭已有心隨下峽舟天下名山
皆可愛夢中慈母不來遊

讀鱷魚文

刺史文章天下無海中靈物識之乎如何皇甫
兼逢吉不及潮州一鱷魚

食蜺

家住東南蜺子村小鎗風味勝侯門眼前下筋
非無處芹曝猶堪奉至尊

社中

桑林伐鼓酒如川秋社錢多春社錢盡道昇平
長官好五風十雨更年年

社屋新成燕子來山丹未落野棠開三三兩兩
兒童戲弄水板花日幾回

社酒開顏一百家春風先動長官衙東君也解

遊人意紅白交開樹樹花

社日年年會飲同東原西埭鼓鼙鼙無人不是
桃花面笑殺河陽樹上紅

夜酌

侍子焚脂弄小孫藥爐分火暖殘樽東風不管
黃鸝怨一夜飛紅滿樹根

問李深之病

竹林花埭酒旗風秋賞春遊事事同伏枕六旬
猶未起相思紅日滿簾櫳

沙上

村逕西來入社松北山終日白雲封徃來獨把
梅花笑只有沙堆不負公

秋江喚渡

何處渡頭風浪喧隔波仙境似桃源瘦藤倦向
人間去喚得船來便上船

春寒

清明天氣如初臘雨脚雲頭枉是春堦下荼蘼
開自晚不隨紅紫怨東君

白雲子全集卷五
一春光景在花枝三月殊非陰雨時只有木犀
偏耐冷小枝簷下對衰遲
看花何處輾香輪江上春寒著莫人衰病未堪
供起倒且便高枕過殘春

題棲霞卷

紅霞小塢地仙家日出耶溪十里花秋竹垣低
是何處有人窓下讀南華

雜興

數行屋蟻下庭蕪墻角扶留綠映裾正是滿樓
山雨過夕陽惟好鷓鴣呼

讀朱晦庵註參同契

神仙不註參同契火候工夫那得知千古晦庵
拈一語可憐無及魏君時

大水浮舟至七星巖頂題其上

七星巖下醉神仙猶占龍床水底眠我有一樽
延壽酒月明今夜對南山

蒼梧寄陳庸時館潯州

山形西上水東流獨泛長江十日舟無翼可隨

白江子全集卷五
飛鳥去相思時復到潯州

題林良爲朱都憲誠庵先生寫林塘春曉

圖

煙飛水宿自成群物性何嘗不似人得意乾坤
隨上下東風醉殺野塘春

出肇慶有懷馬玄真

紅塵白浪去來年細雨秋江看木綿何處思君
君不見羚羊峽尾七星前

金州別陳昂

江上東風捲暮旗木綿花下進舟遲金州未是
窮途別莫贈黃金只贈詩

滂興

粉牆經雨舊成痕青被扶留直到根俗吏款門
教暫去隔簾拋果戲諸孫

畫鷹

落日平原散鳥群西風爽氣動秋旻江邊老樹
身如鐵獨立槎牙一欠伸

木犀枝上小鵲

白雲子全集卷五
翠裙白領眼中無飛上木犀還一呼乾坤未可
輕微物自在天機我不如

贈周成

虛無裏面昭昭應影響前頭步步迷說到鳶飛
魚躍處絕無人力有天機

春中雜興

春寒著莫絮袍輕遊走何山更乞晴夜夢髯翁
作人拜安知不是白龍精

小雨如絲落晚風東君無計駐殘紅野人不走
傷春客春在野人杯酒中

香煙裊入袖中純讀易山齋日未斜領取乾坤
分付意扶留生耳木犀花

端陽後一日里人送角黍酒至

荷瓢童子問誰家老婦簷前駐紡車角黍喚回
端午夢還從艾棧得松花

九日木犀未開

野徑香沉舞蝶稀柴門樹老著花遲含章此日
無窮意只有堦前拄杖知

白
沙
子
金
集
卷
五
八
四
菊來栗里何須酒梅到孤山不欠詩老去未甘
詩酒廢木犀其那放花遲

木犀花下待陳秉常

常疑楚客染秋菊不信唐人醉牡丹何處木犀
香可愛須君曾到玉臺山

謝九江惠菊

誰將此菊種江濱物色當年漉酒中若道淵明
今我是清香還屬隔江人

紫菊移來紫水濱白頭對著白綸巾花前酌酒

笑未足酒後簪花笑殺人

故根迢迢九江濱歲晚相看此道巾不用詩流
強分別種花人是賞花人

鶴袖披翻野水濱黃花簪破小烏巾腰間我有
坡翁帶解與西隣賣酒人

夜夢見太母急呼諸孫前拜

欲覺未覺夢中夢有形無形身外身喜逐悲來
呼不得曾孫前拜太夫人

馬肇文惠油酒并錄示哭一峯先生詩及

送林緝熙掌教絕句復以香一束賦三絕
見意

誰以三年報一峯舒剛蓋有古人風一詞亦到
君親地何處無天覆馬龍

清油濁酒慰家貧老子山中但白雲君欲看雲
須久坐晴窓端為起爐熏

南川釣艇已橫波裏水漁翁又放歌今日未知
明日事且傾君酒為君哦

贈周二仔入京 文都家僕

故人訝我久無書只到長安夢亦踈萬里周郎
知此意杖藜江上送長鬚

次韻張廷實東所寄興見寄

天邊暝色將秋至海上長風送月來何處無人
識東所夜分樓上了餘杯

明月清風放兩頭一筇挑到古尼丘而今老去
無筋力獨坐江槎看水流

扳緣千尺采松花服食為仙未到家我得丹方
欲傳與肯捐妻子入煙霞

路自飛雲過閬壺仙人迂我又趨趨相期汗漫
歸何處獨占煙波理釣魚
放倒瓊林半醉間半留醒處著江山病來只有
冠裳在不帶朱門一事還
不求老馬在長途誰道長安一馬無伯樂未來
幽薊北憑君傳語到平湖
邯鄲枕上看三台誰撼藜床喚老萊幽事不應
全廢却夜來風吼澗中雷
西風吹老木蘭花水閣氛氲帶晚霞溪上行人

不相識隔舡對語問誰家

海上峯巒今屬誰携來四百布囊垂或嫌珠珮
多遺恨化作長髯未可知
門下諸生無一個山童撤却臯皮坐與儂七尺
青團蒲今年換與張東所

沽酒

酒店無錢與酒遲初晴天氣菊殘時乾坤不放
閑人醉也到江門酒盞知

題南浦送別圖爲蔣方伯

何人更賣雲卿屨我昔曾歌孺子亭欲寫別離
非此日西山南浦認丹青

對菊

花開無酒醉江濱莫笑人間破葛巾廬阜長官
歸未得看花還共去年人

食香誰亦到湘濱西崦東籬濫一巾去歲金英
曾照我今年玉盞又驚人

白鴈南飛到海濱吟邊芳氣襲衣巾門通水竹
三丫路坐對求羊一輩人

秋英如雪照江濱板折須防小侍巾曲檻兩頭
門盡掩先生元是惜花人

日日狂歌菊澗濱花神應識玉臺巾西風爲掃
繁華去不遣紅芳近老人

花舫誰撐綠渚濱道人醉脫碧方巾東籬不飲
江州酒彭澤當年未盡人

精魄當歸楚水濱天涯聞訃忽沾巾西風吹醒
蒲團夢獨對黃花憶故人

扁舟何處剡溪濱夜半歸來雪滿巾爭似一瓢

秋菊伴漆園風暖蝶疑人
我貌不如蘇穎濱秋風華髮已盈巾有錢不買
重陽醉籬下黃花也笑人
菊坡持酒越江濱 御筆親題與醉巾丞相九
回徵不起碧虛長揖夢中人
知章投老鑑湖濱還戴華陽羽士巾元亮也歸
三徑去至今人笑是痴人
陶家園裏舊開叢復入山窓對此翁一曲一杯
花下醉人生能得幾回逢

種扶留用舊韻

輕落藤稍淺打溝種時須共小遲留浮生日月
供眠外付與携鋤抱甕休
絜矩工夫但一溝山中夜雨長扶留莫教看到
詩人眼千首鳶魚也未休

漫興

娉婷鄭女著織羅能為襄王激楚歌一曲霓裳
都掃盡尊前無地舞陽阿

贈麥岐出遊

錯教人意向花濃萬樹香飄一夜風行過東津
莫回首一番春事又成空
我得無言贈麥岐乾坤遊走到何時千山萬水
無窮意分付芙蓉杖一枝

八月八夜忽夢玉宇無瑕碧雲燦爛南斗
下大書八字云生生德俊逸超全下有
四人面西而行或隱或見覺後紀以絕句
八字光騰斗外天碧雲西去擁群仙乾坤此夢
無人話起步中庭月上弦

贈人

誰將兒女浪千情春雨來時草又生夢亦是真
真亦夢石泉槐火對清明

悼周鎬 京之兄也京以母命赴春官鎬亡京南歸在道

一封長夏寄京書不遣歸來待拜除誰與行人
報消息高堂今日要人扶
一雙玉樹出東溟豈意先隨曉露傾三十六年
惟一女老夫垂淚寫銘旌
叔子還家定買碑墓旁將刻老夫詩詩中不借

閑言語只寫人間母子悲

嗜好平生法帖詩偶逢方士問刀圭何人擺脫
浮生事得似周郎易簪時

里巷三年六七墳老年無淚哭交親數聲願借
遼陽鶴喚醒人間未死人

望白龍池

在本邑崑崙山頂

西望不見崑崙池白龍上天歸何時望中心逐
飛雲去半掛玉臺松樹枝

涵虛數尺鏡光懸舊是頭陀洗鉢泉又有山人

來洗耳白龍休占水中眠

雲影天光共一池池中消長白龍知仙翁騎龍
上天去只有明月照漣漪

梅花

一枝低壓塢籬斜細路穿雲竹半遮忽被暗香
相引去小塘詩景在西家

老樹眠江水齧之茫茫水月浸花枝暗香捲入
滄溟去不是漁翁那得知

沙籠寒月樹籠煙香徹龍溪水底天斜隔竹林

白沙全集卷五
九
窺未得更尋西路上漁船

南枝照水忽先開漁父灣頭有釣臺罷釣歸來

溪路暝暗香幾度倩風媒

孤山山下一枝梅春到南枝尚未開酒醒西樓

看月坐清風湖上捲香來

朝來溪上弄花九天地氤氲日月還無覓暗香

踈影處笑呼歐九問孤山

氣龜壘
倒孤山

梅花撩我又冬殘落日深山一凭闌病眼不知

花妙處只將花作野人看

梅花如雪擁溪扉漁父村南負酒歸縱飲不知

花落去酒醒船上見花稀

日日花邊喚酒船梅花開處酒家眠青山一片

無人買誰與先生辦酒錢

樵客入林聞曙鴉梅梢殘月暗溪沙沿溪路盡

無人到更說林逋住處賒

舍南朝見一枝梅舍北桃花昨夜開笑問花開

何太急青春肯逐酒錢來

南北枝頭月正懸月中誰此弄溪船晚來吹入

梅花去吹到林逋木榻邊
蒼煙裊樹溪冥冥夜半江樓笛一聲悵望錯疑
溪女折滿頭只慣挿金櫻

桃花

雲鎖千峯午未開桃花流水更天台劉郎莫記
歸時路只許劉郎一度來
山中兒女不知秦無賴漁郎最惱人溪上桃花
君莫種東風不貸武陵津

題袁氏知歸卷

鳥在蒼岑魚在淵水深林密保生全秋風莫怨
茅茨破白首眠看榻頂天

陰厓水必到滄溟石罅涓涓勢已成萬古乾坤
流不盡望湖亭下更分明

示我陰陽闔闢機春陵墨雨灑門扉直從罔象
前頭見人與乾坤一處歸

界江八景

河橋柳色

廬阜清風長官宅渭城朝雨王維詩東西綠遍

河橋路長與離人照酒卮

驛館槐陰

槐陰覆庭日早午小吏夜出迎當路長江閱盡
往來人淦水西邊此槐樹

爐渚晴煙

香爐紫煙生一縷天風吹落蘆花渚江東行客
歸去來霑衣猶帶金陵雨

古埠漁燈

埠頭半點夜燃枯釣得淞江一尾鱸漁父聯舟

向東岸東岸人家有酒沽

界江霽月

玉宇蟾輝秋展鑑界江水色夜磨銅乾坤好景
誰無分只問靈臺得屬公

西僧禪梵

竹徑風傳西梵聲隔牆深夜有人聽山僧老去
無功德還倚禪門誦佛經

東閣書聲

閉戶書聲午欲乾夜闌燈燼落蒲團

白沙子全集卷五
朝廷若問觀風使猶有書郎信長官

大橋牧笛

山花爭插帽頭紅蘆葉鳴鳴弄晚風橋大板平
牛步穩老牛差後不愁儂

讀周朱二先生年譜

千年幾見南康守嘆息人間兩譜開但使乾坤
留一緒聖賢去後聖賢來

一語不遺無極老千言無倦考亭翁語道則同
門路別君從何處覓高蹤

白洋潭魚

白洋風起釣絲飛夢裏漁蓑此夜歸明日冷香
橋上望海鷗相對便忘機

白洋潭上浩煙波何處漁歸此放歌月下聞之
開口笑江門三尺有藤蓑

讀定山集

千首鶯花萬蠹魚眼昏心亂意何如白頭許我
編摩不活水源頭洗硯書

寄張主事

白沙子全集卷之三
從來妙處不傳書十夢人間久不如試問十洲
三島外白雲誰伴老仙居

贈鄒汝愚吏目時館壯哉亭

川雲嶽雨天模糊萬里山亭此客孤又借南風
吹一月酒葫蘆打藥葫蘆

題伍氏雙喜圖

莫怪龍鍾此葛巾穿花入竹去頻頻秋風酒熟
南山下更與殷勤報主人

白沙子全集卷之五 終

